

նորին եւ 'ի Հաշիւ արկեալ զանճնական դրամս նորին , գտին 80,000 դահեկան , զորս ժողովեալ էր 'ի դպրութենէ իւրմէ մինչեւ ցվախճան իւր , զորս եղին յարկըն հասարակաց , և դարձեալ կնքեցին զՊատրիարքարանն , թողեալ զկահս և զկարասիս իւրաքանչիւր 'ի տեղւոջ իւրում :

Գումարեցաւ ժողով մեծ ազգային 'ի Մայր Եկեղեցին Կոստանդինուպօլոյ , ուր ընթերցան հանրագրութիւնք միաբանաց Երուսաղէմի , որք վասն ընտրութեան նորոյ Պատրիարքի , ('ի 20 Սեպտեմբերի) : Եւ 'ի ժողովի աստ թողեալ զլսնդիր Պատրիարքութեան , նախ՝ ընտրեցին 'ի միաբանութենէ զարժանաւոր անձինս լինիլ Խորհրդական , որք էին՝ Գարրիէլ Եպիսկոպոս Փոխանորդ , Մեղրիկ Մկրտիչ Եպիսկոպոս Լուսարար , Եղիա Եպիսկոպոս Գարապաւնիկալ և Աւագ Թարգման . նախկին Լուսարար Սիմէոն Եպիսկոպոս , (զսա ընկեցեալ էր Պօղոս 'ի պաշտօնէ) . Կարապետ Եպիսկոպոս Ճառաճի , Մինաս Եպիսկոպոս Մոմաշէն , Կիրակոս Եպիսկոպոս Երուսաղէմացի . Ծերունի Ստեփաննոս վարդապետ , և գրեցին եօթն կանոնական բանս , յաւելեալ 'ի վերայ 12 կանոնական բանից վասն բարեոք կառավարութեան Աթոռոյն , և բազմակնիք գիր մահսեւրական , եւ ընտրեցին զՓոխանորդն Երուսաղէմի զՅակոբ վարդապետ իբր Փոխանորդ 'ի կողմանէ ազգին , եղեալ 'ի տեղի նորա զՄարկոս Եպիսկոպոս : Մեկնեցաւ Յակոբ այսոքիւկ գրեամբք 'ի մայրաքաղաքէ անտի ('ի 1 Հոկտեմբերի) եւ հասեալ յԱքքէ՝ կատարեաց անդ զգործն ընդ Կուսակալին՝ և եհաս յԵրուսաղէմ , (1819 . 'ի 13 Յունվարի) : Եւ յետ երկուց աւուրց բացեալ զգրեանս ընթերցաւ առաջի ամենեցուն , որոշեաց զԽորհրդարանն և հաստատեաց զազգընտիր Խորհրդականս , և ամենեքեան հնազանդեալ հաճութեամբ ընկալան զհրաման ազգին , և սկսան սիրով և յօժարութեամբ հոգալ զՍ . Աթոռն . Եւ 'ի նմին ամի վճարեցին 663,000 դահեկանս 'ի պարտուց : Եհարց Յակոբ վարդապետ վասն ընչից հանգուցեալ Պատրիարքին , որպէս պատուիրեալ էին նմա ազգայինք . և Խորհրդականք պատմեցին նմա մի ըստ միովէ՝ որպէս արարեալ էին՝ զորմէ գրեցաք : Յետ կարգաւորելոյ զայսոսիկ՝ գրեաց թա-